



Jumat, 16 April 2021

Ogen: 1 Timotius 2:1-2



Notoken Kemajun GBKP



Kemajun sekalak jelma ibas kerina dampar geluhna subuk ibas persekolahen, dahin ras sidebanna mbelin kipengaruhi kalak siisekelewetta. Banci saja ikataken mentor. La saja ibas praktek pelayanen calon Pendeta ntah pe calon pegawai bage pe ibas piga-piga dahin sideban. Mentor la saja mere contoh tapi pe mere pedah ras kai-kai saja si dahiken si imentorina. Bageme Timotius ibas pelayanenna, Paulus jadi bapa rohanina, tetap ngarak-ngarak alu pedah ras pengajaren kai-kai saja siarus ilakoken Timotius.

Ibas renungenta sendah ituriken Paulus ngataken man Timotius arus tetap ertoto nehken sapaat, pemindon ras pengataken bujur ma Dibata guna kegeluhen kalak sinterem. Bagepe man kerina sierkuasa, merentah, raja, pemimpin si arah pendahinna mereken kegeluhen sisenang ras erkemalangen man Dibata. Mbelin kepe gegeh pertoton e guna kalak sideban, kalak siiendesken man bana guna ikepkepna selaku rayat, bangsa ntah pe perpulungen. Sabab arah kepentaren ras pengarak-ngarak Dibata ngenca pemimpin-pemimpin banci ndahiken pelayanenna alu mehuli.

Wari enda wari sipeduaken sidang majelis sinode (SMS) GBKP secara virtual. Tentuna melala lebih kurangna si banci jadi je tapi erkiteken situasi pandemi paksa enda enda me simehulina sabab enggo itunda dekahna sada tahun. Emaka tanggungjababta kerina perpulungen khususna Moria pe ikut muat bagin ibas dahin enda alu ikut notokenca. Nehken sapaat man kerina Moderamen, peserta, undangan ras pimpinen sidang, kelompok bagepe media elektronik siipake gelah kerina ipasu-pasu guna kiniulin ras kemajun GBKP ibas paksa sireh enda. Amin la kita atan ikut ibas persidangen enda tapi mbelin tanggungjababta guna kegeluhen gerejanta. Moria GBKP bagin ibas rencana simbelin Dibata guna kegeluhen gerejaNa.